

Nov mussavia per il problem dals giats abandonads

■ (cc) Durant l'enviern tschertgan giats abandonads e daventads selvadis savens in suttetg en stallas ed en auters edificis. Blers da quests animals crappan perquai ch'els han me-mia pauc nutriment ed èn malsaus. La transmissiun da malsognas sin auters giats da chasa cuntegna in grond potenzial da privel. Ensem cun la Societad grischuna per la protecziun dals animals ha l'uffizi per la segirezza da virtualias e per la sanadad d'animals elavurà in mussavia che gida las vischnancas a schliar il problem dals giats abandonads.

Giats abandonads e daventads selvadis chattan ins en lieus nua ch'els han avunda nutriment e bunas pussaivladads da sa zuppar. Durant ils mais d'enviern tschertgan quests giats in refugi en edificis averts, en remisas, en hallas da fabricaziun ed en stallas. Sch'els giats e lur descendents èn abandonads durant in temp pli lung perdan els dal tutfatg ils lioms cun l'uman e daventan selvadis. Els èn timids e na sa laschan strusch dumestigar. L'emprova da tschiffar tals animals e d'als disar vi d'ina vita en in'abitaziun u en ina chasa da giats fa per ordinari naufragi,

perge ch'ils animals pateschan en lur praschunia. Sche la glieud pavla quests giats sa reuneschan els enturn ils lieus da nutriment en abitadis, en vitgs ed en citads e cuntanschan là en moda nuncontrollada populaziuns da grondezzas considerablas.

Agid per las vischnancas

En il rom da mesiras per garantir l'urden public procuran las vischnancas che giats fugids vegnian returnads sche pussaivel a lur possessuras e possessurs. Sche la possessura u il possessur na po dentant betg vegnir erui ston ils animals – sin ordinaziun da la vischnanca – vegnir plazzads en in lieu adattà u vegnir mazzads en il mender cas. Il nov mussavia è d'ina vart in agid per las vischnancas per evitar che giats daventian selvadis e da l'autra vart per survegnir la controlla da populaziuns da giats ch'èn gia daventads selvadis. Cun agid da mesiras cumbinadas, intenziunadas ed adattadas a la situaziun pon las vischnancas reducir u schizunt impedir problems da sanadad tar populaziuns da giats daventads selvadis e tar giats da chasa.

Giats abandonads e daventads selvadis

In mussavia per las vischnancas grischunas per schliar il problem



Uffizi per la segirezza da virtualias e per la sanadad d'animals dal Grischun
Societad grischuna per la protecziun dals animals

Il frontispizi dal mussavia per las vischnancas per schliar ils problems cun giats che vegnan selvadis.